



UNIVERSITÄTS-  
BIBLIOTHEK  
PADERBORN

## **Universitätsbibliothek Paderborn**

### **Außlegung der Episteln vnd Euangelien: von Ostern bis auff das Aduent**

**Luther, Martin**

**Wittemberg, 1547**

**VD16 L 5614**

6 Göttlich schelten vnd straffen.

**urn:nbn:de:hbz:466:1-37032**

**S**prichstu abermal Wer kan denn Prediger oder Richter sein/ oder jemand verklagen/ So man niemand sol an seine ehre reden/ oder einen Narren schelten? So müssen hinfurt Prediger/ Richter/ Keger/ zeugen etc. alle zumal still schweigen. **H**ie (habe ich gesagt) mus man diesen vnterscheid halten/ Das ich/ als ein Prediger/ dich schelte öffentlich auff dem Predigtstuel/ oder heimlich in der Beicht/ Das thue nicht ich/ Sondern Gottes Wort/ Darumb darffstu hie nicht klagen/ das ich dir an deine ehre rede/ Denn ein Prediger/ seinem Ampt nach/ kan niemand schelten noch schmehen/ Es were denn ein schalck/ der sein eigen grollen vnd hasß in das Ampt mengete.

**A**lso kanstu auch nicht sagen zu einem Richter/ wenn er seinem Ampt nach handelt/ Du redest mir an meine ehre/ das du mich einen Dieb oder Mörder heissest/ Denn solchs hat nicht der Richter/ sondern Gott geredt. Darumb gilt nicht/ das du woltest sagen/ Es sey deinen ehren zu nahe/ das du gescholten oder gestrafft wirst/ Es ist dir freilich zu keinen ehren gesagt/ Aber es hats nicht der Mensch/ sondern Gott gethan/ Solte aber der selbe nicht recht vnd macht haben von dir zu reden?

**W**o aber Gott schon durch das Ampt das vrteil gefellet hat/ so mag darnach auch ich vnd andere davon reden/ Denn von Gottes öffentlichen wercken vnd gerichtten mag jderman reden/ Vnd ist nu gleich als eine Historia oder geschicht/ da man allenthalben von sagt/ Darumb mus man denn noch hie nicht jderman das maul also stopffen/ das man nicht dürffte sagen/ Dieser ist ein Dieb oder schalck/ nach dem der Richter solch vrteil gesprochen hat/ Denn du kanst niemand nicht mehr ehre nemen noch geben/ denn jns

Gott gegeben oder genomen hat/ Weil nu Gott das vrteil spricht/ vnd durch den Richter oder Prediger öffentlich ausruffen lesset/ so mag jederman mit gutem gewissen danon sagen.

**D**as rede ich abermal darumb/ das man jmer des holzwegs wil/ wie man predigt/ so wil sichs jmer decken vnd schmücken/ das man sich Gottes Wort nicht binden lasse/ Also/ wenn wir sagen mit Christo/ das niemand sol mit dem Nehesten zornen/ noch schelten/ noch böses wider in reden/ so wolt darnach jderman gerne den Predigern das maul stopffen/ das man kein öffentliche sünde vnd laster antasten noch straffen sol.

**D**arumb ist das endlich die meinung/ Wenn du als ein Mensch/ aus deinem eigen furnemen/ dem Nehesten an seine ehre redest/ vnd also dich bezeugst mit seinen sünden/ das ist böse vnd vnrecht/ Aber wenn es so weit komet/ das es Gott selbs offenbar macht/ da gilt nicht/ das ich einen öffentlichen huben solt loben/ welcher von Gott offenbarlich oberwiesen ist/ Denn das were eben so viel/ als wolte ich solche bosheit verteidigen oder vberhelffen. Darumb mus mans alles also machen/ das wir nichts anfangen noch furnemen von vns selbs/ sondern darauff sehen/ wenn es Gott heisset/ oder von Amptes wegen gethan wird/ so hat es Gott gethan/ vnd ist alles recht vnd löblich. Darumb sol man hienicht das maul zu thun lassen/ sondern der warheit vnd gerechtigkeit beystehen/ vnd solch vrteil helfen loben vnd preisen/ andern zum schrecken vnd warnung.

Das sey auff dis mal gnug von diesem Text.

p Am siss

Wo Gottes vrteil offenbar ist/ da wird niemand an sein ehre geteod.